

Каноны о усопших восьми гласов

Начало канона, общее для всех заупокойных канонов.

**Канон, глас 4-й,
егоже краегранесие:
«Правило четвертое, кончину вспоминая»**

Песнь 1

Ирмос: Моря чермную пучину невлажными стопами древний пешешествовав Израиль, крестообразными Моисеовыми руками Амаликову силу в пустыни победил еси.

Припев: Дивен Бог во святых Своих, Бог Израилев (поклон).

Держай за десную руку раб Твоих, настави их на пажить безсмертную, Спасе, на зрение доброты Твоея страстоносцы мученики умолен бывая.

Покой, Господи, души усопших раб Твоих (поклон)¹.

Неизреченную и блаженную славу Твою, преставльшиися верою наследовати сподоби, Христе, презирая прегрешения их, и оправдай благодатию, изливанием Твоея крове.

Слава: Мертвостию Твоею живоносною умертвителя умертвил еси, Христе Боже, ихже прият и имже Твою воздая жизнь, Сам ныне упокой верныя рабы Твоя.

И ныне: Красен превысочайшими добротами, яко Божий Сын, а яко из Тебе, Дево, воплотивыйся и на Древе повешен быв, доброты не имеяше, смерть за всех прият.

Песнь 3

Ирмос: Не мудростию, и силою, и богатством хвалимся, но Тобою, Отчею Ипостасною Мудростию, Христе, несть бо свят, паче Тебе, Человеколюбче.

Дивен Бог во святых Своих, Бог Израилев.

Победивше идольскую прелесть мученицы, Владыку и Бога ныне молят, даровати прежде скончавшимся Божественный покой.

Покой, Господи, души усопших раб Твоих.

Обращающееся оружие преминути благоволи и древа животного подобно причастие улучшить, яже преставил еси рабы Твоя, Владыко.

Слава: В раи, Христе, пищи водворится рабом Твоим сподоби, идеже глас чист празднующих, согрешений оставление тем даруя.

¹ В 1-й и 9-й песнях припевы читаются с поклоном, в остальных – без поклона

И ныне: Божественному рождеству девство сочетала еси, Пречистая, Зиждителя бо всяческих несказанно родила еси, Егоже хотению вся повинуются.

Господи, помилуй (*трижды*).

Седален, глас 6-й

Воистинну суета всяческая, житие же сень и соние, ибо все мятется всяк земнородный, якоже рече Писание: егда мир приобретаем, тогда во гроб вселимся, идеже вкупе царие и нищии. Темже, Христе Боже, преставльшихся упокой, яко человеколюбец.

Слава и ныне, Богородичен: Всесвятая Богородице, во время живота моего не остави мене, человеческому предстательству не ввери мя, но Сама заступи и помилуй мя.

Песнь 4

Ирмос: Вознесена Ты видевши Церковь на Кресте, Солнце праведное, ста в чине своем, достойно взывающи: слава силе Твоей, Господи.

Дивен Бог во святых Своих, Бог Израилев.

Явльшеся мученицы яко светильницы, небо просвещают церковное, иже и у Спаса Христа просят даровати усопшим ослабление.

Покой, Господи, души усопших раб Твоих.

Жезл силы имуще Крест Твой раби Твои, мирское море проидоша; ихже всели в гору Твою, Господи, в нейже соделал еси святыню.

Слава: В селения воистинну возлюбленная, яже избрал еси, Владыко, и яже приял еси рабы Твоя, благоволи вселитися, яко милосерд, идеже праведных души.

И ныне: Иже мертвыми и живыми обладая, воплощься яко Человек из Тебе, Богомати, смерть претерпе, плотию Безсмертный, разрушив смерти силу.

Песнь 5

Ирмос: Ты, Господи, мой Свет, в мир пришел еси, Свет Святый, обращаая из мрачна неведения верою воспевающия Тя.

Дивен Бог во святых Своих, Бог Израилев.

Ты, Господи, Твоего величества прославил еси мученики, техже ради прежде усопшия упокой, яко благоутробен.

Покой, Господи, души усопших раб Твоих.

Нерешимый живот, красное радование, и непрестающее веселие, прежде умершим подаждь, Многомилостиве.

Слава: Едине Блаже, и источниче благодати, упокой иже в вере и Твоем познании житие скончавших.

И ныне: Поем Тя, Богомати, Еюже сущим во тьме возсия неизреченный и неприступный Свет, и любовьию блажим.

Песнь 6

Ирмос: Пожру Ти со гласом хваления, Господи, Церковь вопиет Ти, от бесовския крове очищися ради милости от ребр Твоих истекшею Кровию.

Дивен Бог во святых Своих, Бог Израилев.

Копие, Божественная Твоя ребра прободшее, обращающееся оружие увидевше, Спасе, да отступит от раб Твоих, мольбами страстотерпцев Твоих.

Покой, Господи, души усопших раб Твоих.

На Древе повешен быв, Спасе мой, рай отверзл еси: в вере убо преставленные в онь всели, яко щедр, и Твоя жизни причастники покажи.

Слава: Пажити животныя сподоби насладитися, иже к Тебе, Владыко, благочестно преходящая смертью и с праведными, иже от века сопричти.

И ныне: Слово, яко Бог сый невидим и, воплощься, видим бысть, от Девы Отроковицы неискусомужныя, и смертью Своею смерть разруши.

Господи, помилуй (*трижды*). Слава и ныне.

Кондак, глас 8-й

Со святыми упокой, Христе, души раб Твоих, идеже несть болезнь, ни печаль, ни воздыхание, но жизнь безконечная.

Икос

Сам един еси Безсмертный, сотворивый и создавый человека; земнии убо от земли создахомся и в землю туюжде пойдём, якоже повелел еси создавый мя и рекий ми: яко земля еси и в землю отыдеши, аможе вси человецы пойдём, надгробное рыдание творяще песнь: аллилуия, аллилуия, аллилуия.

Песнь 7

Ирмос: В печи авраамстии отроцы персидстей, любовьию благочестия паче, нежели пламенем, опаляеми, взываху: благословен еси в храме славы Твоя, Господи.

Дивен Бог во святых Своих, Бог Израилев.

Терпение же и пождание, и крови всех мученик избавление прием, благочестно усопшия у Тебе упокой, яко милостив и благопременитель.

Покой, Господи, души усопших раб Твоих.

Причетавый к первородным и праведным Твоим, Спасе, души раб

Твоих к Тебе преставленных, сподоби непрестанно Тебе наслаждаться, всеми владущаго.

Слава: С веселием и со дерзновением и светлостию, Слове Божий, Избавителю, благоволи, яко Бог, на облацех сresti тя, ихже Ты приял еси ныне, яко милостив.

И ныне: Благословенная Богородительнице Дево Мати, радуйся: Тебе бо ради бысть воистинну смерти потребление, живот же неразоримый умершим даровася.

Песнь 8

Ирмос: Руце распростер Даниил, львов зияния в рове затче; огненную же силу угасиша, добродетелию препоясавшеся, благочестия рачители, отроцы, взывающе: благословите, вся дела Господня, Господа.

Дивен Бог во святых Своих, Бог Израилев.

Мучеников приемля моления и милование к единоплеменному, души упокой, Владыко, в вере Твоей усопших, грехи презря сих, вопиющих Ти: вся дела, благословите, Господня, Господа.

Покой, Господи, души усопших раб Твоих.

Мертв со беззаконникома вменився, мертвым источил еси жизнь безсмертную, преставленныя убо рабы Твоя о надежди воскресения, Царствие Твое улучшить сподоби, Спасе, Тебе вопиющих: вся дела, благословите, Господня, Господа.

Слава: Воистинну приснотекущий источниче благодати, в небесных селениях скончавшися рабы Твоя и житие тленное оставльшия кротко, Спасе, примири, Тебе вопиущия: вся дела, благословите, Господня, Господа.

И ныне: Едина Ты явилася еси на земли, Дево Пречистая, и Мати безмужная, Бога бо родила еси, Владычице, паче слова и смысла, и вечную жизнь мертвым источила еси. Темже вси Тя благословим, Марие Богоневесто.

Песнь 9

Ирмос: Ева убо недугом преслушания клятву вселила есть; Ты же, Дево Богородице, прозябением чревоношения мирови Благословение процвела еси. Тем Тя вси величаем.

Дивен Бог во святых Своих, Бог Израилев.

Дал еси истинным страдальцем, и мучеником дерзновение молити Тя, Господи: даждь же верою преставльшимся, Божественное тех ради избавление, в место селения святого вселитися даруя.

Покой, Господи, души усопших раб Твоих.

Мановением вседетельным, иже всяческая полезне соделовая, живыми имея область и мертвыми господствуя, яко всесилен, учини, яже преставил еси рабы Твоя на водах покойных.

Слава: Иже естеством сый яко благ, Иже богатый в милостех и в

благости, избави от тьмы кромешния, призывающия Твое имя, верою оправдав и благодатию, сих просвети, яко человеколюбец.

И ныне: Образы, Всенепорочная, Твоего рождества пророцы проповедаша, инако же друзии преславно Тебе нарицания слагающе, Живот бо во аде сущим родила еси, державу смерти разрушающий.

Достойно есть яко воистинну блажити Тя, Богородицу, присноблаженную и пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу, Тя величаем (*поклон*).

Окончание канона, общее для всех заупокойных канонов.